

東
華
續
錄

東華續錄

同治五十八

臣王先謙敬編

臣張式恭恭校

秋七月戊午諭軍機大臣等曾國荃奏布置西北防務情形一摺
捻匪全股由汝陽等處西趨意圖窺伺鄂邊襄樊隨棗一帶與信
陽南陽等府州處處毗連官文曾國荃見已通飭水陸各營實力
防堵並派郭松林等軍先赴德安再進隨州扼要駐守布置尙屬
周妥該撫擬俟捻蹤竄至鄂境卽馳赴德安督辦軍務具徵勇於
任事甚屬可嘉惟此時捻氛業已逼近鄂疆曾國荃若先期前赴
德安豫籌防剿於布置調度機宜尤爲便捷著卽酌度辦理曾國
藩亦宜嚴飭周盛波等軍與鄂軍互相援應會合夾擊毋任該匪
肆行蔓延鮑超一軍自粵東撤回後節節逗留數月以來尙未與

東華續錄

同治五十八

賊接仗任意遷延坐耗餉項殊屬不成事體仍著官文曾國荃傳諭該提督迅赴豫境會同各軍合力剿辦毋得玩視軍務自干重咎前據御史朱鎮奏請飭劉連捷幫辦楊岳斌軍務等語楊岳斌所部多係水師劉連捷於陸路機宜頗稱熟悉該員此時應已病愈著曾國荃於該員到鄂時卽飭令赴甘歸楊岳斌調遣將此由六百里各諭令知之○諭崇實駱秉章奏遵覆黔省防剿事宜請仍畱周達武在川帶兵一摺另片奏署遵義令馮樹貪婪請飭撤省查辦等語前據崇實等奏劉嶽昭於發摺後卽馳赴遵義行營此次所發摺報相距二十日而劉嶽昭尙未定期赴黔殊屬任意遷延不知緩急輕重劉嶽昭身受厚恩務當懷遵疊次諭旨迅將黔西大定畢節一帶土匪殲除淨盡速赴新任以重職守毋再遲誤干咎崇實駱秉章恐黔西等處匪徒被剿竄突川疆擬畱周達

武暫行在川帶兵係爲保衛邊圉起見見在劉嶽昭仍回遵義辦賊足資統攝周達武著准其暫留川省一俟邊防稍鬆卽行前赴貴州提督本任毋得藉端奏留遵義各寨甫經就撫必得地方官妥爲綏輯方能漸次安定若如崇實駱秉章所稱署知縣馮澍賦性貪婪惟事接括近復藉招練爲名橫加苛派是該處之民旣死於賊復死於官儻復激成事端又將重煩兵力著張亮基卽將馮澍撤省嚴行查辦另委賢員接署以蘇民困將此由五百里各諭令知之○予浙江殉難知縣湯金策祭葬世職○己未飭山西迅解甯夏餉需○庚申諭內閣李雲麟奏請將昏懦悞事及避賊出境之大員懲辦一摺科布多參贊大臣廣鳳平日不能振作當塔爾巴哈台被圍待餉急切廣鳳並不將該城餉銀派員趕緊解送迨武隆額派兵迎提始行發給卒致餉銀未到塔爾巴哈台巴失

巴里坤至科布多購買羊隻廣鳳復不肯墊給羊價有心截留餉銀其因病奏請開缺實屬意圖規避種種昏懦殊堪痛恨塔爾巴哈台領隊大臣圖庫爾前於塔城失陷時念係賊眾兵單從寬將該員革職畱任茲據李雲麟奏稱該員棄城出境避賊遠颺直至科布多境內豈可稍事姑容廣鳳圖庫爾均著革職拏問交刑部治罪尋刑部奏審明已革大員被參截留餉銀及失守城寨各節按律定擬得旨已革科布多參贊大臣廣鳳著發往黑龍江效力贖罪已革塔爾巴哈台領隊大臣圖庫爾著發往吉林效力贖罪○以冊封朝鮮國王妃派理藩院右侍郎魁齡爲正使委散秩大臣希元爲副使往封○予古城陣亡署領隊大臣色普詩新佐領惠斌協領功訥布驍騎校德連布守備高吉官祭葬世職○辛酉諭軍機大臣等李雲麟奏請另簡能員辦理伊犁將軍事務並統

籌西路全局及擬先規取烏魯木齊暨哈城失守情形一摺所奏
於西路情形尙爲明晰伊犁將軍印務前派榮全署理該參贊在
俄國臺站未經具奏行抵何處因令李雲麟代辦藉以聯絡聲勢
規復各城見據李雲麟奏擬統兵由奇古一帶趨烏魯木齊相機
進剿布置亦頗有條理自毋庸以力難任重爲辭稍涉推諉軍情
變幻無常西陲又遠在萬里之外而奏報寥寥朝廷豈能深悉所
降諭旨與見辦情形或有未能盡合之處至內地軍務未靖兵餉
俱形支絀人材原不敷簡派李雲麟豈不知之並非有人壅蔽準
回兩部逼近強鄰未便遂議棄地烏魯木齊爲諸路要衝屯田最
多該署參贊擬馳赴烏里雅蘇台與麟興等會商調蒙兵進剿所
見尙是此時李雲麟計已行抵烏城卽著與麟興車林敦多布籌
商將賽因諾顏札薩克圖汗兩愛曼之兵調齊由麟興統帶前進

科布多所調蒙兵由德克吉訥布爾和德統帶前進李雲麟卽馳赴塔境將厄魯特人眾挑選精銳交棍噶札勒參等統帶隨同進剿均於古城取齊見已時屆秋令該署參贊旣知進兵以七八月爲宜自無待諭旨敦迫卽著速由古城進兵規復烏城藉可節節進剿棍噶札拉參旣與土爾扈特親王有隙卽著飭令統帶厄魯特部眾隨同該署參贊由古城進兵毋令仍畱塔境至土爾扈特親王革爵之事旣未平允豈可置之不論著李雲麟查明具奏候旨辦理以維外藩之心李雲麟另片奏科布多所調之兵擬分兩營交阿隆阿棍噶札拉參分帶並擬減爲一千二百名其所調賽因諾顏等蒙兵分爲三營與布爾和德等分帶尙屬妥協著照所請行並著奎昌明瑤於換防綠營兵內酌挑二三十名及換防滿員內酌派二三人隨同李雲麟辦理營務其科城所存捐輸馬一

千匹卽著奎昌等撥給厄魯特蒙兵以資乘騎李雲麟另片奏請將解存科城之伊犁餉銀四萬兩就近提用等語此項餉銀前經廣鳳等奏請提充科城官兵銀餉批令撙節提用所存銀兩著奎昌等全數撥交李雲麟支用並前諭畱備塔爾巴哈台軍需費銀二萬兩見在塔城旣難進剿並著奎昌等一併發給李雲麟軍營以免停兵待餉刑部主事錫綸旣據奏稱熟悉西路情形卽著該旗都統傳知該員卽由草地前進趕赴古城交李雲麟差委護軍參領福恩都司德祿均著准其調赴軍營福恩卡倫員缺著奎昌等派員署理李雲麟所請另行揀派之處並著該衙門查明辦理李雲麟膺此重任務當臨事而懼不可稍涉誇張遇有應奏事件不妨據實直陳以副朝廷殷殷求治之意再據棍噶札勒參奏北路軍情並請調喇嘛幫同進剿及自陳足疾舉發各摺該呼圖克

圖志切報效深堪嘉尙前因降旨獎勵頒給關防毋庸另行派人執掌其擬請於烏里雅蘇台揀帶喇嘛幫同進剿如於軍事無礙卽著李雲麟傳諭令其於呼圖克圖呼畢勒罕內挑選喇嘛二三名以資得力棍噶札勒參另片奏於科布多所屬地方派喇嘛一人設立經館唎經著照所請行至該呼圖克圖奏稱無兵可帶見在李雲麟擬令酌帶厄魯特兵丁隨同進剿是棍噶札勒參並非無兵可以統帶該呼圖克圖受朝廷厚恩著李雲麟剴切傳諭令其奮勉圖報毋得以無人聽信等辭希圖諉卸李雲麟見在代辦伊犁將軍印務各城皆其統轄所有此次麟興等統帶烏科兩城及厄魯特兵丁均著歸李雲麟調遣該署參贊久經行陣較之麟興等自能諳練麟興務當和衷商酌不得稍有掣肘李雲麟亦不得稍存趨避惟當力任其難用副期望將此由六百里各諭令知

之○王戌諭軍機大臣等何瑄奏官軍會合同眾克復哈密城池並請免伯錫爾罪名各摺片哈密久爲賊踞經何瑄派兵前往會同伯錫爾所派回兵將逆回擊敗克復城池斃賊甚多所辦甚妥著訥爾濟傳諭伯錫爾協同凌祥等各飭所部合力兜剿務將逃散餘匪殄盡毋令餘燼復然尤須分別良莠不可濫殺無辜並著何瑄飭令凌祥等嚴防該匪回竄毋稍疏懈見在該城南經收復亟須地方大員前往鎮撫文麟係哈密辦事大臣責無旁貸著卽由肅州軍營星夜馳赴該城會同伯錫爾將善後事宜妥爲籌辦奎章昨已改補哈密幫辦大臣自應趕赴新任以重職守並著劉蓉查明奎章行抵何處催令迅速前進毋任逗畱伯錫爾本有應得之咎既經會合官軍剿賊克城著加恩免其治罪伯錫爾當倍加感激撫綏回眾力捍賊蹤若再不知愧奮國法具在寬典不可

屢邀也成祿督兵圍偏肅州賊勢已蹙著乘勢迅圖攻拔統率鶴齡等軍星夜出關由哈密一帶節節西進見在關外自巴里坤以東漸次安定李雲麟既已行抵烏里雅蘇台卽著遵奉昨日諭旨調派各軍赴古城取齊與巴里坤哈密聯爲一氣庶進攻烏魯木齊可無後顧之慮巴里坤餉需奇絀何瑄請飭陝甘總督籌撥銀數十萬兩固屬甘省應解之餉惟關內餉銀亦未充足著楊岳斌趕緊先撥數萬兩交巴里坤委員張積功解赴何瑄軍營以濟眉急其餘欠解各款仍當隨時接濟敦煌安西等州縣素爲產糧之區並著楊岳斌嚴檄各該地方官撥運倉糧數千石赴巴里坤以資兵食山西應解新疆餉銀前已諭令趙長齡由綏遠城解往烏里雅蘇台著卽懷遵前旨辦理其直隸四川山東河南應解新疆餉銀仍著趙長齡飛催各該省解赴山西由趙長齡遞至綏遠城

轉解烏里雅蘇台此項餉銀到後並著李雲麟商同麟興勻撥各路軍營並分濟巴里坤應用將此由六百里諭知李雲麟楊岳斌劉蓉趙長齡訥爾濟成祿文麟奎章並傳諭何瑄知之○癸亥諭軍機大臣等李鶴年奏官軍追剿擒匪獲勝並派兵分剿情形一摺張牛等股匪在上蔡境內屢經官軍擊敗仍屯踞百尺集一帶復經宋慶等督兵夜襲賊營奪回所踞民莊三處追過洪河殲斃甚多此股逆匪屢經敗挫其勢已蹙著李鶴年卽飭馬德昭宋慶等迅速進兵乘機痛剿務將此股殄盡至任賴等股匪由太康扶溝折回睢州杞縣延及陳畱通許汴省東南數百里一片賊氛李鶴年見派余承恩所部三營赴省東剿辦並派吉林黑龍江馬隊及親兵各數百名分赴睢杞會剿惟豫軍兵力較單不敷分布曾國藩所部駐紮於周口一帶者甚多著卽迅派潘鼎新劉松山張

詩日等督率各營會合豫省各軍併力兜剿毋任賊蹤蔓延該大臣查看桃宿等處運河防務計已嚴事自當迅赴周口就近調度以期呼應較靈並著嚴檄鮑超一軍趕緊馳往豫省探蹤迎剿毋任逗畱貽誤將此由六百里各諭令知之○盛京將軍都興阿奏遵旨力求整頓欲靖邊外須先清腹地見擬通籌辦理得旨著卽酌量緩急相機妥辦其吉林遣散淘金流民並著迅派妥員分投查明豫籌安插之法毋令滋事○甲子諭軍機大臣等蔣益澧奏統籌粵東全局一摺所陳整飭吏治整頓釐稅清釐交代教練水師酌增兵餉籌辦土客清理欠餉裁汰兵勇八條詳加披覽具見該撫實心任事力圖整頓卽著瑞麟蔣益澧悉心籌商認真辦理蔣益澧與瑞麟同辦一事當和衷共濟行之以漸持之以恆不可有名無實尤不可始勤終怠務使吏治軍務民風日有起色方爲

不負委任另片奏籌辦洋務情形所陳亦頗中窾要該督撫等惟當虛心實力慎發徐圖前據左宗棠奏擬於閩省擇地設廠購買機器募雇洋匠試造火輪船隻當諭令該督照議辦理茲據蔣益澧奏擬於沿海省分建設鐵廠製造輪船或在福建設廠或在廣東設廠等語著瑞麟蔣益澧咨商左宗棠會籌妥辦將此由五百里各諭令知之○乙丑欽奉 慈禧皇太后 慈禧皇太后懿旨戶部右侍郎李鴻藻之母姚氏秉性淑慎教子成名今以疾終深可軫惻朝廷優禮大臣推恩賢母著賜祭一壇賞銀二千兩經理喪事由廣儲司給發以示眷懷李鴻藻事母至孝哀痛必切朝廷以孝治天下原應聽其照例終制以遂孝思第該侍郎膺 文宗顯皇帝特簡授皇帝讀盡心啟沃迄今六年夙夜罔懈皇帝春秋鼎盛緝熙典學功修正篤李鴻藻諄諄納誨皇帝樂從誠不可或

離左右且軍務未平兼資翊贊溯查雍正乾隆年間大臣如孫嘉淦朱軾嵇曾筠蔣炳于敏中等皆奉 特旨任守制或開缺辦事入直內廷近今如曾國藩胡林翼閻敬銘亦皆奪情起用李鴻藻著開戶部右侍郎缺守孝百日後卽赴弘德殿授讀仍在軍機處行走凡遇朝會不必與列此係遵照 列朝成憲權宜辦理日前召見醇郡王倭仁徐桐翁同龢再三垂詢均已深喻此意朝廷不得已之苦衷中外臣工應能共諒李鴻藻當思輔導皇帝弼成聖德移孝作忠莫大於是其勉抑私情以副 先皇帝簡任之恩朝廷倚畀之重毋以守禮固辭○曾國藩奏臣於六月十五日由水路東下沿途水勢盛漲南陽微山等湖與運河連成一片春間所修隄牆自韓莊以下兩岸較高沙土質鬆大雨後多已坍塌自黃林莊以下二百餘里兩岸較低隄身或露數尺或全淹水中目

下茫茫巨浸賊匪斷難飛渡將來秋深水落竟須另行全修二十
日行抵宿遷縣二十七日准閭敬銘咨稱據曹縣稟報任賴兩逆
因張市朱仙鎮等處河水驟漲不能西渡仍由扶溝太康回竄已
至杞縣之沙窩睢州之芋香鋪勢將直趨曹境七月初一日又准
李鶴年咨稱據睢州稟報六月十八日該州西南之馬頭寨已被
賴逆攻破占踞豫兵不敷馳剿咨商撥兵接救各等情臣查扼守
沙河賈魯河之議必俟捻逆各股全趨沙河以南方可興辦見在
任賴一股既爲沙河大水所阻不敢西行折而東竄則防河之策
斷難遽行應卽先行撥兵馳剿劉銘傳業於六月二十三日自徐
州啟行潘鼎新一軍前在西華周盛波一軍前在太和此三軍者
本議分防沙河見令移赴睢州曹考一路專辦沙河東北之賊而
鮑超之霆軍劉秉璋楊鼎勳王永勝之淮軍劉松山張詩日之湘

軍仍辦沙河西南之賊頃已分咨相機勦辦惟自五月下旬以後
淮南北諸郡大水爲數十年所未有積潦盈途深過馬腹軍中米
糧子藥車載夫運寸步難行不特各軍拔隊滯濡卽臣處文報往
來亦多阻隔遲誤而秋稼被淹民廬漂沒臣既自憾調度乖方軍
務毫無起色又恐飢民失所不免從賊以圖偷生勦辦撫綏兩俱
棘手籌思反復憂愧實深臣在宿遷停畱數日初聞捻蹤回竄之
信本擬改駐徐州就近調度惟賊蹤既分兩支無論臣駐何處均
有不能兼顧之勢入豫之議不可再緩俟與漕臣吳棠會晤後卽
在楊莊換船由湖沂淮徑赴陳州周家口籌辦一切喬松年奏任
賴兩逆入豫後卽沿沙河上竄因水勢盛漲未能竄渡仍折回陳
州有竄往曹單之意張牛兩逆自渡沙河後合股竄至汝甯並分
擾信陽確山意欲窺伺楚境臣旋恭奉諭旨自槐店以下至正陽

關飭臣派兵設防查自槐店至正陽關計四百餘里必須厚集兵力扼防皖省各軍以英翰張得勝爲大枝應卽責成該兩軍辦理自槐店以至江口集以英翰一軍任之自江口集至正陽關以張得勝一軍任之均令憑河堅守務期穩固其沙河內水師並派總兵黃鳴鐸帶領總兵余先元等各船聯絡扼守亦令各認地段以專責成不令一賊得渡惟任逆一股尙在沙河以北或竄往曹州或回竄皖境尙未可定無論竄向何處曾國藩所派追擊之師必能緊躡其後其淮河內水師經曾國藩咨長江水師提督黃翼升會同臣所部礮船分段劃守一俟黃翼升到時卽可定議分防上諭軍機大臣等任賴兩逆由扶溝太康回竄已至杞縣之沙窩睢州之芋香鋪勢將直趨曹境賴逆又攻破睢州之馬頭寨該逆見爲沙河之大水所阻不敢西行折而東竄防河之策尙難遽行

曾國藩見令劉銘傳等移赴睢州朝考一路專辦沙河東北之賊
鮑超等軍仍辦沙河南之賊卽著分飭諸軍相機進剿毋任遷
延貽誤致成不了之局淮南北諸郡大水實深廬緊撫恤災黎萬
不可緩入秋以後水勢漸消河隄旣須另修不妨以工代賑著曾
國藩與吳棠李鴻章妥籌辦理毋令被災地方窮民失所任賴一
股如竄近徐宿著吳棠派兵協力剿洗其張牛股匪前據李鴻章
奏經豫軍追過洪河已近鄂邊曾國荃前有駐紮德安之奏著卽
統兵出省擇要扼紮督率鮑超等及曾國藩所派之劉秉璋等軍
李鶴年所派之馬德昭等軍合力兜剿如有臨敵畏葸不肯奮勇
上前者卽由曾國荃從嚴參辦務須趁賊勢日蹙之時一鼓殄除
湖北省城及近邊一帶防務著官文悉心籌畫督飭辦理毋稍疏
懈曾國藩與曾國荃共辦一事將來無論賊勢分合地方遠近總

須聯絡一氣若能殄滅一股兵力較易展布賊蹤已近曹考閭敬銘身任地方責無旁貸著卽出省督率防兵認真堵剿儻再令賊蹤蹂躪定惟該撫是問河防旣暫不能辦喬松年惟當飭令英翰等整飭諸軍視賊所向會合夾擊不得株守一隅僅爲自完之計黃河水勢甚漲目前可稱天險惟轉瞬秋深水涸難保該匪不潛圖竄渡並著曾國藩問敬銘李鶴年督飭防兵巡船加意守禦毋任偷渡將此由六百里各諭令知之○命唐際盛來京以李榕爲湖北按察使

由浙江鹽運使遷

○江蘇通州竈匪滋事守備宋遠祥等死

之子祭葬世職○丙寅調畢道遠爲戶部右侍郎以胡家玉爲兵

部左侍郎

由左副都御史遷

○丁卯諭軍機大臣等李鶴年奏捻股分竄

剿辦獲勝鮑超奏製造軍器豫籌布置情形各一摺張牛等逆屢被豫軍剿敗復經劉松山等軍追至雙廟及西平等處疊次獲勝

賊已西竄舞陽李鶴年務當飭令宋慶馬德昭等軍跟蹤追擊並著曾國藩檄令劉松山等督率所部窮賊所向盡力躡斬毋任喘息任賴等逆在睢杞等處肆擾經潘鼎新率兵會合豫軍勦辦獲勝劉銘傳亦率所部馳往豫境該匪突竄祥符蘭儀一帶勢將由汴梁西遁李鶴年當一面嚴防省城一面檄令豫軍奮勇追勦並著曾國藩飭令潘鼎新等軍合力勦辦黃河一帶李鶴年仍當督飭礮船嚴防賊匪搶渡鮑超見住麻城據稱因帳房車輛未齊暫行駐候並述曾國荃函商之語欲分軍布置於光固信陽周口等處及任齊豫省追軍驅賊入鄂截賊歸路就山谷水濱爲扼險殄賊之舉第該匪避兵而行是其慣技既知鄂省駐有重兵豈肯自入陷阱官文曾國荃務當權衡緩急辦理嚴飭鮑超覘賊所向迎頭截擊陝洛浙川等處武備空虚難保該匪不乘虛奔突李鶴年

原當豫飭該地方官督飭團練扼險拒守並著官文曾國荃飭令鄂軍越境迎剿兼顧南陽淅川要隘以爲豫軍聲援曾國荃仍遵奉前旨即行出省駐紮德安就近調度鮑超原摺著鈔給曾國藩李鶴年閱看將此由六百里各諭令知之○庚午諭內閣吳棠奏湖河盛漲揚河東岸民牯倒卸帶塌正隄過水一摺本年江北各屬因陰雨連旬湖河並漲經在事人員啟放車南兩壩旁洩水勢而正河溜勢如常此築彼漫致將高郵汎清水潭迤南二牯南牆於六月二十九日辰刻漫擊倒卸帶塌正隄過水雖因來源旺極積長不消所致該管河汎各員究屬疏於防範署淮揚道劉咸著摘去頂帶揚州軍捕同知兼管河務范志熙著革職畱任永高汎千總袁定標協防徐順均著革職畱汎效力以示懲儆吳棠有督率之責未能先事籌畫咎亦難辭著交部議處被水災黎蕩析難

居情殊可憫吳棠見已捐廉動款派員馳赴口門上下妥爲撫恤
卽著李鴻章郭柏蔭遴委妥員分往高郵興化東臺等處勘災賑
濟務令實惠均霑毋使一夫失所○以湖南官軍攻克貴州思南
賊巢賞還已革按察使李元度原銜頂帶總兵官王永章等升敘
有差○壬申欽奉 慈禧皇太后 慈禧皇太后懿旨前因戶部
右侍郎李鴻藻之母病終推恩賜祭賞銀以示榮寵並令李鴻藻
於守孝百日後仍赴弘德殿授讀在軍機處行走原係酌遵 成
憲從權辦理茲據吏部奏稱轉據李鴻藻呈稱該侍郎母氏苦節
多年撫育教誨之恩纖毫未報一旦慘遭大故偷生視息負疚已
深樞要之地綱紀攸關輔導聖學尤貴志行完粹之人若自蹈愆
尤則進講獻納之際何以置辭懇請終制各等語情詞懇切具見
惻忱惟念李鴻藻膺 文宗顯皇帝特簡授皇帝讀於今六年當

此緝熙典學正就將日進之時該侍郎盡心輔導弼成聖德則所以慰天下臣民之望者莫大於是前因軍務未平各督撫等奪情起用者指不勝屈況機務殷繁尤資贊畫前降諭旨甚明李鴻藻惟當恪遵前旨仍於百日守孝後照常趨直用副 先皇帝簡擢之恩第思該侍郎哀痛未忘不得不稍示區別前有旨令遇朝會不必與列尚不足以示體恤李鴻藻著遵照雍正年間 世宗憲皇帝諭旨二十七月內不穿朝服不與朝會筵宴遇有祭祀典禮咸集之處均毋庸與列該侍郎當深感朝廷曲體之情勉抑哀思移孝作忠毋得再行陳請以副委任○癸酉諭內閣前因李鴻章等奏查明蘇松等屬裁除浮收實數禁止大小戶名目當經降旨令該督等勒石遵行茲復據李鴻章等將減定徵漕餘耗折價各數查明具奏開單呈覽計蘇州府屬一廳九縣減定賦額應徵米

五十五萬九百餘石共減去浮收米十九萬二千八百餘石減去
浮收錢七十五萬三千五百餘串松江府屬一廳七縣減定賦額
應徵米三十一萬九百餘石共減去浮收米十萬八千八百餘石
減去浮收錢五十萬五千七百餘串常州府屬八縣減定賦額應
徵米三十二萬三百餘石共減去浮收米七萬三千石零減去浮
收錢二十一萬五千二百餘串太倉州併所屬三縣減定賦額應
徵米十一萬五百餘石太倉鎮洋二州縣共減去折價浮收錢九
萬四千串零嘉定寶山二縣共減去折價浮收錢十萬七千六百
餘串以上蘇松常太四府州屬共減去浮收米三十七萬四千六
百餘石減去浮收錢一百六十七萬六千二百餘串又蘇松常鎮
太四府一州所屬各廳縣共額徵銀二百十五萬兩零折收錢文
除鎮江府屬未定外蘇松常太四府州屬共減去浮收錢四十萬

餘串該署督等卽將減去浮收實數欽遵勒石永遠奉行至鎮江府屬四縣減定賦額應徵米十九萬三千二百餘石共減去浮收數目若干著該署督等於啟徵時另行酌覈奏明辦理○改浙江台州府同知駐家子管理海門巡防海口事宜移原駐海門之臨海縣縣丞於花橋黃巖縣縣丞於烏巖甯海縣縣丞於亭傍分司緝捕○甲戌諭軍機大臣等御史朱學篤奏用兵貴在神速不可爲一隅牽掣見在西北甘回接連新疆陝西爲回匪窺伺滇黔未平用兵省分正多尤可慮者外國要求無厭捻氛若不迅掃兵力更難肆應請飭曾國藩擇要進兵相機速剿等語捻匪滋擾日久蔓延愈廣迄未大受懲創若不力籌進剿糜餉勞師軍務將何日蒞事曾國藩自宿遷南下由湖入淮沂流赴周家口道途不免迂折著卽趕緊趨程星夜馳赴陳郡親臨各營就近調度以期呼應

較靈並著督飭湘淮各營視賊所向盡力窮擊不得專事防守任賊縱橫該大臣公忠體國爲朝廷柱石尤當統籌全局迅將擒匪竭力剿除以副委任朱學篤原摺著鈔給曾國藩閱看昨據副都統安住奏稱豫省軍營積弊在於馬步諸將領彼此不相救應進止參差兵心不能合一尤慮賊匪偷渡黃河滋擾河北三府等語所奏不爲無見著李鶴年督飭前敵將士申嚴號令務須於進戰時彼此互相援應以期聲勢聯絡黃河防務尤關緊要所有水陸防軍李鶴年務當嚴密布置並著飭令在事文武將各處渡口實力稽查毋任奸細潛行偷渡安住原摺著摘鈔給李鶴年閱看將此由六百里各諭令知之○諭傳諭貴州布政使兆琛兆琛奏督軍進扼邛水等處擊賊獲勝並分路進剿情形一摺清江台拱兩城久爲苗匪竊踞並分股出犯思晃等州邊界經兆琛督軍進扼

玉屏並派陳昌運帶兵進紮鎮遠府衛兩城沿途頗有斬獲兆琛
見已由玉屏進紮青谿分軍扼紮各路要隘著卽飭令各軍將鴨
溪等處屯踞匪苗乘勢掃蕩由邛水進克清江等城毋任久踞投
誠之青龍腦等寨苗民著卽妥爲安撫並責令殺賊自效周洪印
一軍由天柱縣進攻江口聖業已獲勝殲渠著兆琛卽檄令該總
兵將江口聖賊巢迅速攻拔肅清後路李元度攻克大小二聖賊
巢情形前已據李瀚章馳奏該撫前奏內有副將李金榜一軍進
紮悶松各營勇丁同時患病竟有全棚不能舉火者是否水土不
服抑係苗匪水中置毒所致著兆琛卽飭令該營官設法醫治妥
爲拊循玉屏等縣殉難士民婦女並著該藩司查明彙案奏請旌
卹將此由四百里諭令知之○以恩承銘安俱爲內閣學士恩承
候補
內閣學士銘
安由詹事遷○乙亥予浙江殉難知縣閻朝貴祭葬世職○丙子

湖南巡撫李瀚章奏遵旨訪查劉儀順劉漢忠周天雲各匪首蹤迹擬俟規取荊竹園後卽飭李元度妥速前進逐細拏辦報聞○丁丑諭軍機大臣等都興阿奏查辦大孤山匪徒並撥換營口洋槍隊伍一摺匪徒王作幅率眾直撲大孤山聲言與會首徐中禮報復經汛員督同徐中禮帶勇迎擊將該匪打敗向西南竄去都興阿已派毓昌等馳往查辦著卽查明起釁報復之端認真清理並該匪等見竄何處趕緊添兵接捕淨絕根株至徐中禮是否卽係從前投誠出力之徐五能否安分守法並著都興阿隨時察看毋稍大意駐防營口之五行隊已調回奉省費蔭魁所帶洋槍隊五百名著卽飭令暫畱營口駐紮春霖所帶之洋槍隊與費蔭魁所部均屬防守天津海口緊要之軍冬底必須調回津郡所有營口應行教練本省之洋槍隊著都興阿趕緊督飭辦理至防護

永陵將來是否需兵抑或於他處酌量移撥以便春霖與費蔭魁
二軍冬底一併調回之處並著該將軍悉心籌畫辦理總之尙書
文祥前畱奉省之天津及吉林黑龍江等軍均是客兵未可久役
於外都興阿惟當豫爲整頓本省兵勇認真教練以期悉成勁旅
力圖自强方爲不負委任將此由五百里諭令知之○諭勞崇光
奏剿辦鎮雄賊匪連獲勝仗屢克賊巢一摺貴州賊匪李開甲等
於上年竄破鎮雄勢甚滋蔓經勞崇光飭令岑毓英督兵進剿連
克賊巢聲威甚壯李開甲被剿窮蹙赴咸甯州軍營乞降該州請
示岑毓英嚴斥不准漆老新一股亦經岑毓英由角奎親往督剿
攻破賊營彝夏所屬一律肅清該處赴牛街之路已經暢行剿辦
頗屬得手李開甲心懷狡詐前經林鴻年招撫後仍肆猖獗此次
因窮蹙乞降豈可墮其詭計岑毓英嚴行斥絕甚屬有見見在賊

果已破其膽已寒著勞崇光卽飭該署藩司乘此聲威將礪礪山礪子山次第攻克進取鎮雄州城以固滇省藩籬並著飭令知府夏廷楫將所需米糧等件源源解運以資接濟刻下秋氣已深各屬銀糧諒已陸續徵解各省指撥之餉計應先後解到卽著該督整飭士馬督飭馬如龍迅速出兵規復迤西毋任杜逆久踞其逗畱川省各員並著該督勒限催令赴滇不准藉端趨避將此由五百里諭令知之○予浙江陣亡鹽大使鄭煜等祭葬世職○戊寅欽奉 慈安皇太后 慈禧皇太后懿旨昨據大學士倭仁等奏懇恩准予大臣終制以維禮教本日復據吏部奏李鴻藻懇陳下忱懇請仍准終制據呈代陳各一摺前因皇帝典學功修正篤李鴻藻不可或離左右曾經召見醇郡王倭仁徐桐翁同龢詢問再三彼時醇郡王卽請降旨慰畱倭仁等亦無異議次日復令軍機

大臣與倭仁等商議亦以聖學爲重不持異同茲覽倭仁等摺內所稱李鴻藻事親盡禮見在奉旨奪情欲固辭則迹近孤恩欲抑情則內多負疚請仍准其終制等語倭仁等既以奪情爲非禮何妨於前次召見時據實陳奏乃爾時並無異議迨兩次降旨慰留後始有此奏殊不可解本日復召見倭仁徐桐翁同龢面加詢問據稱聖學關繫甚重臣等亦願李鴻藻照常入直惟親見該侍郎哀痛迫切勢處萬難是以代爲陳請並無他意聖功緊要請仍令李鴻藻遵奉前旨等語是倭仁等亦知此次奪情之舉係屬不得已從權辦理想中外大小臣工亦必能共諒此意李鴻藻當思聖學日新四方多故盡忠卽所以盡孝前降諭旨業已詳盡其恪遵前旨毋得拘泥常情再行籲懇○諭軍機大臣等楊岳斌奏籌辦南路軍務請飭穆圖善移師西向覆陳彭楚漢等軍並無諱敗爲

勝情形各摺片回匪被陝軍擊退折竄入甘秦安清水等處賊騎縱橫漸偏秦州該督見調蔣凝學統帶安字營勇赴省俟此軍到時卽擬出省剿辦秦州附近一帶回匪惟省垣兵變甫經稍定且附近各處賊匪尙未殄除正須大吏駐紮藉資鎮攝該督甫還蘭州卽思出省能否無憂內顧務須統籌全局妥協辦理不得顧此失彼又蹈從前覆轍秦州一帶見旣檄令王得勝等相機堵剿並調張在山傅先宗等前往助剿著卽嚴飭各軍極力剿辦毋令完善之地致有疏虞平番迤至涼州俱爲逆回出沒亟應分兵剿除賊匪疏通省垣糧路見在甯靈一帶業已安定無須多兵駐紮著穆圖善酌度情形督率所部由中衛鼓行而西直赴平番節節進剿毋稍延誤該將軍仍酌留兵勇鎮守甯靈等處以備不虞其平固一路防剿事宜卽著楊岳斌飭令雷正綰妥爲辦理楊岳斌所

稱彭楚漢等軍在車道嶺等處擊賊獲勝並無諱敗捏報情事仍著督飭彭楚漢等認真勦賊奮勉立功楊岳斌另片奏截留林之望摺報拆閱自請議處一片並將林之望摺補行呈遞該藩司由驛馳遞摺報楊岳斌輒於中途截留擅行拆閱且遲至數旬之久始行補遞實屬不曉事體楊岳斌著交部議處將此由六百里各諭令知之尋吏部議楊岳斌應降五級調用毋庸查級紀議抵得旨楊岳斌著加恩改爲革職畱任降爲三品頂戴以示薄懲○諭林之望奏稱督臣楊岳斌辦事認真持身勤儉惟於封疆大體未甚諳練輒致爲人所誤雷正綰等軍轉戰多年熟悉地利賊情該督由陝入甘因劉蓉先入之言以雷正綰爲不可用周顯承等窺伺其意遂從而傾陷之致令一敗塗地又倣劉蓉遠兵親勇之法以省兵爲不可用省標及外鎮將備陸續罷退以隨營楚人代之

諸事更張怨望之徒遂謂該督引用私人本省升途斷絕各營憤恨省標特首發其難省城源源倉存糧一萬數千石蘭州道英奎設局專供客兵並紛紛捐罰將城內搜括無遺因將源源倉之糧全供楚軍縱令地方官那移借發標兵額糧致官民蓄積一空秦王川撤防不守糧無來源英奎復請派員弁赴鄉凡民間窖藏悉行查封給以賤價該員並巧於趨避自請赴陝購糧迄無顆粒運甘本省委提晉餉七萬兩行至東路復被督臣全數截畱以致省城糧盡兵潰並據楊岳斌奏參糧臺支放由該藩司主持何以毫無稽覈率爾敷陳並稱林之望所參英奎各情均係得自傳聞全無影響及查明彭楚漢等軍在車道嶺獲勝屬實各等語楊岳斌與林之望所奏均有偏袒之處持論未得其平著穆圖善將甘省營兵每月糧額多寡楚軍勇糧多寡及欠餉日月久暫詳細查明

並將林之望所參英奎周顯承各情確切查明秉公據實覆奏毋稍徇徇彭楚漢等軍在車道嶺獲勝情形是否諱敗爲勝著一併查明具奏林之望摺一件楊岳斌片二件均著鈔給閱看將此由五百里諭令知之○予貴州殉難訓導王景春祭葬世職○庚辰諭軍機大臣等李雲麟奏憑陳北路軍情及請飭麟興等添調西兩盟征兵定限調齊進剿各一摺前因新疆需兵孔亟諭令麟興等迅速調兵六千名前往迄今日久僅止派出札薩克圖汗賽因諾顏兩盟兵一千八百名復因察漢烏蘇卡倫有警酌留一千名派出兵丁僅八百名爲數實形單薄斷乎不能得手見在庫克吉泰尙未出邊所有車林敦多布派出之兵丁三百名卽著隨同李雲麟進剿並著麟興車林敦多布於札薩克圖汗賽因諾顏兩盟壯丁內再各挑五百名以厚兵力所需口食鹽菜等項俱由官爲

給發該兵丁既無苦累不准藉詞推諉著麟興等剴切曉諭該兩盟兵丁於諭旨到後剋期進發毋得稍涉遲緩李雲麟卽統率已派出之兩盟兵丁先行馳赴古城相機進剿儻續調之壯丁一千名如有遲誤情形並著據實參奏所有烏城捐辦戰馬二千匹卽著李雲麟會商麟興照數給發以資騎乘麟興見署烏里雅蘇台將軍責任綦重自未便隨同李雲麟進剿車林敦多布於蒙古言語性情素能諳悉著改派車林敦多布督率蒙兵前進自更得力烏城參贊員缺亦甚緊要車林敦多布啟行後勢難兼顧錦丕勒多爾濟向來辦事尙屬公允見聞病已痊愈卽著署理烏里雅蘇台參贊大臣所有李雲麟續調之兩盟壯丁卽責成錦丕勒多爾濟趕緊徵調取齊毋許耽延遲誤李雲麟奏此項官兵備長馬長駝起營前進著照所請行另片奏稱請借用科布多存餉等語科

城所存餉銀前已諭令奎昌等全數撥給諒該署參贊接奉前旨
即可提用將此由六百里各諭令知之○以都城盜賊肆行諭步
軍統領等嚴緝並飭禁賭局煙館○允訥爾濟等奏將句結逆回
之哈密台吉帕塔訥什等正法飭屬興撥解巴里坤兵餉○辛巳
飭直隸山西借撥察哈爾臺站經費○壬午諭內閣長善奏請清
查旗籍並變通銷檔章程等語山海關旗營往往有逃回遺犯仍
在該旗營房暗地出入涇迹潛伏若不嚴行查拏實爲地方邊防
之害著長善嚴飭該管協領等隨時訪查如有由配逃回及作奸
犯科人犯毋論銷除旗檔並在營房民居潛住者一經查出卽行
拏解按律懲辦並著隨案聲明將該管官處分概予寬免儻不肯
認真查拏知情故縱或別經發覺卽將該管各官嚴參懲處該旗
之鄰右親族人等一併嚴行治罪至銷除旗檔安置旗人家屬各

節道光年間定例基嚴近來銷檔之案並不認真覈辦以致有名無實日久弊生著刑部按照長善所陳變通章程妥議具奏○諭軍機大臣等都興阿奏匪首糾眾搶入大孤山調兵剿辦一摺匪首王作幅勾結黨與三四百名攻入大孤山與會首徐中禮爭圍械鬪將徐中禮夥眾擊敗盤踞山內形同叛逆該處山川險要亟須撥兵剿除都興阿見派劉景芳馳赴鳳凰城遏賊東竄商令色爾固善等分帶馬步各兵由省城取道岫巖直擣大孤山進剿並有戰船在海面鈔截等語著卽飭令帶兵各員實力剿辦務當乘該匪初起之時趕緊殄滅不可觀望因循致令蔓延戰船是否足恃都興阿等當嚴飭水師協領認真截剿毋得稍有疏懈致戰船被賊擄搶轉滋後患都興阿等另摺奏擬派兵捕打冬圍藉肅山場等語捕打冬圍必須抽撥各城兵丁前往見在大孤山匪眾未

平各城官兵未便遠出致令地方空虛山場伏莽尙未肅清都興
阿前奏擬俟製齊鍋帳等項於秋令入山清理卽著嚴飭在事帶
兵各員實力按剿務須淨絕根株該將軍所請捕打冬圍著俟明
歲察看情形再行舉辦將此由五百里諭令知之○諭官文等奏
捻蹤逼近鄂境曾國荃擇期出省並官文奏請飭撫臣幫辦軍務
各一摺捻逆大股分道竄至新野鄧州湖北之隨棗光穀均形喫
重官文等見在責成郭松林等分路扼守布置尙爲周密曾國荃
定期前赴德安調度該撫久在行間自能相機策應卽著督率各
軍奮力擊剿如應山東北無賊窺伺卽調熊登武等軍策應西路
毋令蔓延襄陽爲南北要衝關繫甚重見雖漢水盛漲但不可不
嚴爲防守曾國荃擬察看賊勢如偏重西路卽移紮襄陽並著該
撫隨時酌量進止鮑超雖因製造戰車稽遲究屬近於耽延著官

文等傳諭該提督卽由隨棗繞出光穀迎頭截擊毋任再有延緩
曾國藩前奏飭令劉秉璋等軍剿辦沙河西南之賊逆蹤見偏鄂
境自當會合夾擊並著官文曾國藩曾國荃隨時知會聯爲一氣
認真攻剿以期迅殲醜類毋任該將領等觀望不前其任賴東竄
之逆卽著曾國藩飭令潘鼎新等實力剿辦毋令紛竄李鶴年身
任豫撫責無旁貸著卽嚴檄各軍跟蹤追剿庶得及早殄滅以副
委任將此由六百里各諭令知之○命湖北巡撫曾國荃幫辦欽
差大臣官文軍務○甲申諭軍機大臣等李鶴年奏張牛兩逆分
股西竄已至新野鄧州任賴股匪由新鄭禹密竄至襄城以南見
飭豫軍分投追剿一摺張牛兩逆經馬德昭宋慶等軍乘勝疾追
頗有斬獲該撫因北面喫緊調回馬德昭一軍見止宋慶一軍追
截兵力殊形單薄該匪見由鄧州往西南奔竄著官文曾國荃督

飭各將領分路扼守一面派兵出境與豫軍合力兜剿盡殲醜類免致入境滋擾更爲妥善曾國荃已紮德安務當審機度勢妥爲調度任賴一股由許禹竄至襄城陝汝一路門戶洞開毫無准備馬德昭一軍勢難兼顧著曾國藩迅飭周盛傳潘鼎新等督飭諸軍實力進剿毋任該匪西竄致剿辦又形棘手李鶴年另片奏朱仙鎮至黃河南岸地係飛沙旋圪旋圪見以六營兵勇先行試辦不能以全力從事自係實在情形著卽照所陳辦理如兵力不敷或添募勇丁藉資防剿前敵之兵未可再行抽調將此由六百里各諭令知之○予貴州陣亡參將王春福等祭葬世職○乙酉諭軍機大臣等麟興等奏籌辦進剿官兵應需烏拉駝馬等項並扼要添防及訓練各軍文盛等奏撥兵候調歷陳俄國變亂情形各一摺前調內地征兵二千五百名應須駝馬等項麟興等擬令札

薩克圖汗賽因諾爾兩部落湊備馬一千七百匹駝八百五十隻
嚮導兵三百四十名派赴西南兩路三十四臺站以備支應均著
照麟興等所議辦理如該兩部落任意推延卽著指名嚴參其官
兵應行分起行走並裹糧前進之處並著麟興等咨會廉至照辦
俾免貽誤官兵備戰馬匹若由張家口沿途牧放送到科城不惟
有需時日且恐遺失倒乏著奎昌明瑤在於該城附近趕緊採買
臚壯馬數千匹俾該官兵到防應用較爲徑便所需馬價銀兩卽
於解科城餉銀內動用歸軍需項下報銷烏里雅蘇台所屬三十
四臺站應備廩羊等款並西面部落訓練蒙兵餉需已諭令戶部
速爲籌撥矣麟興等調撥札薩克圖汗等部落兵數與李雲麟前
奏小有參差其應如何相機調撥及防守德德庫鄂博等處之兵
著李雲麟會商麟興等妥籌調度其東兩部落應調各兵著文盛

阿爾塔什達卽照麟興前調之數趕緊挑選並配齊軍火駝馬鍋帳等項迅速派赴烏城聽候調遣文盛等奏據章京慶徵稟稱俄國廓米薩爾丕飄斯面稱伊國逸出罪人九百名在城南邊界肆擾又有帕勒雅克三千人反亂伊國已派人防守各口等情與本日麟興等奏俄國邊界滋事情形大略相同惟廓米薩爾領事官等來文及俄國卡倫人等所言伊處反亂情形不同著麟興車林敦多布文盛阿爾塔什達各飭派出官兵認真防範不可稍涉鬆懈車林敦多布奏籌辦地方情形願自備資斧赴烏屬西南遊牧緊要地方巡查訓練等語車林敦多布前已有旨令其督率蒙兵隨同李雲麟剿賊仍當懷遵前旨隨同李雲麟馳赴古城進剿毋得以巡查遊牧等詞藉端推諉另片奏喀爾喀四愛曼應派蒙古兵各一百四十三名已飭各照數點派卽著帶赴李雲麟軍營聽

候調遣以後遇有地方公事緊要軍情仍應會銜具奏期於和衷共濟李雲麟惟當懷遵七月二十四日寄諭督率各軍迅赴古城妥籌勦辦以副委任將此由六百里各諭令知之○河溢胡家屯飭豫省撥解辦工銀兩諭張之萬設法搶護

八月丁亥朔甯夏將軍穆圖善奏籌計見在軍情先帶馬隊馳赴中衛布置進勦得旨鹽固安撫事宜仍當妥籌辦理不可稍涉大意該將軍見擬馳赴中衛察看進兵卽著催調各營統帶前進與楊岳斌之兵聯絡聲勢埽蕩逆氛以副委任○戊子劉蓉以病免調喬松年爲陝西巡撫以英翰爲安徽巡撫調張兆棟爲安徽布政使以李福泰爲廣東布政使

由按察使遷

○予河南陣亡縣丞劉昌

祚等祭葬世職○己丑諭內閣閻敬銘奏濮州城圩被水見籌賑濟一招山東濮州地方自黃河漫口後州城久被水浸居民於南

岸築圩遷避本年陰雨兼旬黃流盛漲致新舊城圩均被淹沒該處被水災黎蕩析離居情殊可憫閭閻敬銘見已籌款體恤著卽督飭該州知州妥爲散放務使實惠均霑毋令一夫失所其城北金隄歲修之費並著寬爲籌備趕緊興修以工代賑○命孚郡王帶領侍衛十員往奠故壽禧和碩公主茶酒○庚寅諭軍機大臣等趙長齡奏捻逆竄擾豫省西路空虚恐闖入晉境請飭李鶴年派兵扼截等語捻逆分股竄向襄城鄧州等處漸近西趙豫省各軍俱在東南追剿恐該逆乘虛西竄晉省雖有黃河之險而山西爲完善之區尤爲該逆所垂涎防堵宜倍加嚴密趙長齡見飭副將閻文思一軍扼紮河干恐尙未能堵截著李鶴年探賊所向如該逆有西竄之勢卽飭令各軍繞前攔截毋令闖入晉境臬司陳湜見赴河東一帶籌辦防務並著該撫知照趙長齡飭令該臬司嚴

密布置毋稍鬆懈復據大學士倭仁奏捻匪屯聚朱仙鎮杞縣鄭州俱有賊匪出沒河北防務緊要請飭李鶴年派員巡察等語捻逆既在杞鄭等處則河北之防豈可稍懈乃如倭仁所奏該州縣僅雇民船數隻有人查驗則以此充數無則仍舊撤去實屬廢弛已極著李鶴年派委妥員實力巡察如有仍前玩泄者卽著嚴行參辦倭仁片著鈔給閱看將此諭令知之○允戶部請飭兩江各司庫清釐徵存諸款按限冊報○以直東梟匪充斥諭劉長佑閣敬銘等嚴緝○德勒克多爾濟請借撥山西庫款以濟運費允之○廣江西石城縣學額九名湖北天門五名○辛卯曾國藩奏任賴等逆東竄臬司潘鼎新一軍行至西華縣爲大水所阻該司銳志剿賊令各營鳧水而進六月二十二日行抵太康探知太康之雀橋杞縣之五岔口通許之底閣等處逆氛連成一片二十五日

徑趨雀橋該逆大股先退邊馬不絕二十六日分兩營留紮雀橋以馬步十二營裹糧疾進敗賊於石頭岡追至油坊岡之大林伏賊出戰我軍連營齊進斬擒悍賊數十名追至林後大寨我軍一擁而上該逆翻牆北竄追殺四五百名立將大寨奪回留二營守之餘悉向前追剿甫行三里任逆率悍黨驟馬衝至萬國順帶馬隊鏖戰擊殺賊目多名附近寨賊大至潘鼎新督各營擊敗之追至武岡沙窩一帶各路寨賊俱遁二十七日乘勝進剿高陽集任賴兩股不敢停趾直竄過賈魯河以西潘鼎新因行糧已罄兵力極疲暫停休息該軍將士於盛暑深淖中忍飢追逐一日三捷實屬異常出力應由臣暫行存記俟續有戰功彙案請獎臣查前此防河之策甫定而該逆回竄杞睢臣深慮其再竄山東則賊分兩路剿辦更形棘手幸潘鼎新一軍迎頭截擊驅之西去仍應防守

賈魯河沙河以扼回竄之路已檄劉銘傳潘鼎新張樹珊三軍仍如前議又添周盛波一軍分段畫守並咨河南撫臣李鶴年迅撥豫軍分防朱仙鎮及黃河南岸一帶據報任賴張牛四逆均竄至裕州葉縣以西去襄陽漸近勢將兩股合併見在劉銘傳等業已興工修浚紳民亦肯效力防河之議或可辦成自古辦流寇本無善策惟有束之使不得逞猶是得寸則寸之道見在除防兵外尙有鮑超劉秉璋楊鼎勳劉松山張詩日等五支游兵俟河防辦成令防河者與游擊者彼此戰更番互換庶足保常新之氣得旨見在捻蹤西趨防河之議可成卽著該大臣督飭地方官紳實力修濬以杜紛竄並飭令鮑超等軍往來遊擊迅殲醜類以慰廑念○曾國藩奏臣行抵雙溝卽聞劉松山張詩日兩軍自六月十七至二十三日在西華上蔡等處四獲大勝殺賊近萬據各路探報

及豫撫來咨大略相同其詳細情形俟該鎮呈報到日再行具奏
臣在臨淮感受暑溼畱住數日七月二十八日登舟西上擬由懷
遠入渦河至蒙亳察看形勢徑赴周家口報聞○予江蘇因公淹
沒知縣譚鼈祭葬卹廕○壬辰諭軍機大臣等瑞麟蔣益澧奏籌
辦西江土客械鬪添調兵勇先剿後撫一摺廣東土客互鬪仇釁
已深此次客匪竟敢明目張膽築壘抗拒官兵實屬目無法紀瑞
麟蔣益澧見已飭令副將徐文秀等帶兵直抵恩平擇要進剿卽
著該督撫督飭諸軍分由大田鄉底大槐等處探蹤前進並添派
勁旅由黃平取道那龍以次助攻仍先斷賊接濟期於有勝無挫
梅啟照礮隊練成著卽飭令督帶前往那吉等處助攻以資得力
蔣益澧察看賊勢如果狡悍難制卽行出省調度用收一勞永逸
之效該匪等被剿勢窮果能真心悔禍自當恩威並用設法安撫

其著名匪首必須一一殄除收其軍械毀其營壘方可相安無事
土民中如有肆意欺陵不安本分者並須隨時拏辦以儆兇頑總
之分良莠不分土客一語已得要領該督撫當仰體朝廷一視同
仁之意毋得聽信土民一面之詞致客籍被脅良民盡遭慘戮是
爲至要將此由五百里各諭令知之○癸巳諭軍機大臣等都與
阿奏匪徒聞風竄逸見飭搜捕一摺王作幅等股匪自竄入大孤
山後猶敢率眾出山經徐中禮擊敗見竄西上坡龍王廟一帶盤
踞並有欲竄邊外大東溝之信該處係沿海潮溝向爲奸匪潛蹤
之所都興阿以徐中禮熟悉路徑卽令其前導大兵徑往搜剿所
辦甚是卽著飭令色爾固善等督帶各兵分投剿辦先將王作幅
翟永亮匪黨及盤踞龍王廟之于正潞一股盡數撲滅隨將該處
無賴游民並私立稅卡妥爲查究分別區逐禁止毋貽後患至南

海一帶近有借團練名目製造軍器械闖搶劫擾害良民情事此等棍徒若不早除必致釀成大患色爾固善等馳抵該處後卽將團練器械悉令交官撤去團長名目不准私設圍子以期消患未萌該將軍仍當隨時體察認真整頓務使沿海一帶土匪永絕根株方爲妥善徐中禮卽係投誠之徐五有無侵吞團練經費及謀利不法實蹟並著都興阿確切查明妥協辦理將此由五百里諭令知之○以近畿州縣冒徵已蠲錢糧諭直隸總督等確查嚴參○甲午諭軍機大臣等李瀚章奏彙報援黔勝仗並添勇籌防情形請飭川省會剿一摺李元度一軍攻克大小壘並附近賊寨多處距荊竹園教匪老巢甚近其苗匪一股亦經兆琛周洪印兩軍由思州天柱等處節節進剿沿途疊獲勝仗直抵鎮遠印水見在黎平股匪糾約各苗欲由古州進撲王寨天柱該處與湖南之靖

州會同毗連李瀚章見擬月撥楚餉三千兩檄交兆琛就地練勇堵禦並由兆琛撥營協守著卽飭令兆琛實力辦理毋令苗匪竄入楚疆李元度一軍不敷分布見擬調募水陸新勇並添設三板戰船扼守江路惟江外教匪上抵遵義綏陽桐梓正安下抵湄潭龍泉思南安化婺川賊巢甚多與荆竹團股匪處處皆可援應該處與川省毗連必須川東合力會剿方可斷絕內江援應著崇實駱秉章卽飭令防邊之師由秀山西陽一帶建瓴而下將外江各匪實力埽蕩與李元度聲勢聯絡以期迅殄逆氛毋稍延誤將此由五百里各諭令知之○乙未諭內閣御史王師曾奏請停止捐免罰科等語所奏不爲無見鄉會試磨勘覆試定例綦嚴近日章程准以銀兩捐免磨勘覆試幾同虛設殊於政體有礙嗣後文武鄉會試磨勘覆試罰令停科停殿試者概不准援案捐免以肅功

令○以鮑源深爲左副都御史

由大理寺卿遷

○丁酉子奉天陣亡通判

劉景醇等建祠○戊戌子四川陣亡知縣肅慶建祠○己亥諭軍

機大臣等有人奏督臣調度乖方請飭查辦一摺陝甘總督楊岳斌前因在江南督帶水師疊克堅城特畀以兼圻重任原冀其調度合宜肅清回務乃如所奏偏厚楚勇捏報勝仗致有童謠流傳並任用參將周顯承知府張瑞珍而以讒言參劾署甯州知州張掄元秦安縣知縣劉元績是非倒置豈能勝此重任楊岳斌前因藩司林之望揭參業經降旨交穆圖善查明據實覆奏茲復有人列款糾參並著該將軍按照摺內所陳逐款查明秉公具奏毋得稍有偏徇又有人奏劉元績在甘肅十餘年所蒞各任俱有政蹟何以楊岳斌正月間參奏內有肆行貪酷紳民呈控劣蹟甚多之語著穆圖善一併詳細確查具奏以昭覈實原摺片及楊岳斌前

參劉元績摺著鈔給閱看將此諭令知之○諭麟興等奏遵調蒙兵西進並將入卡俄人逐出請飭山西撥解經費各摺李雲麟統兵西進前經麟興等於賽因諾顏札薩克圖汗兩愛曼遊牧蒙兵調撥八百名限日赴烏交李雲麟調遣會同科塔兩城蒙兵一併前進著麟興卽飭令該盟長等趕緊辦理並著車林敦多布遵奉前旨隨同李雲麟統帶蒙兵馳赴古城進剿毋得藉詞推諉錦丕勒多爾濟前已有旨令其署理烏里雅蘇台參贊大臣卽著麟興催令速赴新任俄人逸入卡倫經官兵逐退出境賽因諾顏等各盟長以邊防有警欲將前調之蒙兵八百名防守遊牧惟見在李雲麟前赴古城爲期甚迫所調蒙兵礙難驟行撤回麟興當嚴飭賽因諾顏等各盟長催兵前進毋許遲誤並飭令該盟長另添蒙防守毋令俄人續入卡倫李雲麟所調之額外蒙古壯丁一千

名卽著麟興責成錦丕勒多爾濟趕緊催調取齊以厚兵力烏科
二城歲需餉銀爲數較多麟興請將欠發乙丑年台站卡倫兵丁
鹽菜銀八千兩於解到新疆餉銀動用補放著准其提出應用將
此由六百里各諭令知之○江西巡撫劉坤一奏封禁山並無齋
匪藏匿得旨封禁山內旣據段起查明俱係耕種棚民並無匪類
著照該撫所奏俟閱兵之便進山查勘如果可以弛禁卽行會同
閩浙總督奏明辦理贛甯民氣强悍仍當督飭地方官認真彈壓
毋許鬆勁○子湖北陣亡知縣王恩綬原籍建祠子變附祀○庚
子諭軍機大臣等官文曾國荃奏訪查近日賊情請籌防西路一
摺張牛等股竄至鄧州一帶向浙川內鄉之意而荊子關潼關
等處爲入陝通衢賊若被擊西竄殊慮處處空虚該督撫已令鮑
超隨時覘賊所在以定進擊之方或徑達浙川或繞過內鄉攔頭

遮截如折而東趨卽令郭松林等從桐柏唐縣橫截而出並令劉
維楨等向新野一路進發遙爲霆軍聲援調度甚合機宜曾國荃
業已馳抵德安鮑超一軍亦已齊抵棗陽卽著就近傳諭該提督
視賊所向迎頭剿擊毋令賊騎入陝荆子關等處有險可扼著劉
蓉調派兵勇妥爲防範喬松年尙無啟程信息該署撫一日在陝
當盡一日心力不得存五日京兆之見儻任賊入秦定惟劉蓉是
問宋慶一軍前次剿賊甚爲出力並著李鶴年嚴飭宋慶激勵部
勇會合霆軍前擊後追以收聚殲之效省防河防並須認真籌辦
毋稍疏懈曾國藩已由臨淮赴周口何日到營殊深厯繫任賴等
股盤踞葉縣舞陽擾及西平著曾國藩督飭周盛傳等軍剿辦此
股賊匪仍兼顧陝省門戶該大臣並當與官文曾國荃隨時函商
統籌全局以期廓清餘孽速竟全功將此由六百里各諭令知之

○諭李雲麟奏遵旨進規烏魯木齊請旨豫定節制請飭後路征兵徑赴奇古並催兵出關兼籌甘肅撥兵情形各摺片李雲麟所籌將三路之兵合攻烏魯木齊在古城安設糧臺按兵給餉並烏科三城見調蒙古四千名定期前進各節均著照所請行成祿一軍前諭令楊岳斌另行派兵圍攻肅州以便騰出該提督出關乃閱時甚久該督並未派兵更替嗣據成祿奏報賊勢甚蹙團剿正當喫緊是以仍令成祿一軍迅速攻拔肅州俾出關後不至有所阻滯茲據李雲麟奏甘肅省城令楊岳斌撥兵駐守飭鶴齡一軍與黃祖淦共圖肅州惟黃祖淦所部不過千餘人而成祿續招之南北兩營二千餘人俱係本地練勇出關未必得力若將此項練勇歸併黃祖淦與鶴齡共圖肅州則成祿一軍可以更替出關等語所籌亦尙周妥楊岳斌回省布置計已大定著卽速飭鶴齡督

兵西進會同黃祖淦接辦肅州攻勦事宜毋再任意抗違自干罪戾成祿於鶴齡等抵肅州後卽趕緊啟程鼓行而西馳赴奇古一帶會同李雲麟等軍相機勦辦不准藉詞延宕李雲麟見在督兵進勦卽著恪遵疊次諭旨調派各軍奮勉立功以副委任奇古民勇進攻逆回先勝後敗散糧雖爲賊踞而該處民勇志切同仇自屬可用李雲麟務當迅速前進招集練勇鼓舞而振作之因糧於賊當可協助官軍共殲醜類也將此由六百里各諭令知之○辛丑諭軍機大臣等劉嶽昭奏籌勦仁懷號匪布置情形一摺劉嶽昭見在折回黔邊因黔西大定畢節一帶賊股尙多擬先將仁懷之大小壘等處號匪撲滅再入黔西庶免後顧之慮該撫已飭各營拔隊進攻大壘寺等處而自帶數營橫出仁懷會合夾擊所籌尙妥著卽督飭所部迅將此股號匪盡數殲除卽由大定一帶節

節埽蕩直抵滇省用副委任另片奏克復地方請飭黔撫委員妥辦善後等語黔中羣盜如毛劉嶽昭由黔進兵沿途剿平城寨斷不能畱兵代守儻地方官不得其人則兵去賊來勞而無益卽劉嶽昭入滇之軍復爲牽掣著張亮基隨時體察所屬賢否遇有軍務地方賊平之後卽慎選賢能牧令將該處善後各事宜妥籌辦理以靖地方毋得專恃客兵置分所應辦之事於不顧也將此由五百里各諭令知之○飭山西購麥石軍械撥解新疆○賞李雲麟頭等侍衛幫辦新疆軍務○癸卯諭內閣楊岳斌奏查明標兵變亂始末並見在辦理情形一摺本年三月間甘肅省城弁兵王占鼐等因糧餉不繼起意聚眾索糧藉口於裁兵亂伍之說誘眾搶殺並欲勾通回匪入城初三日子刻後營兵丁下城求糧前左中各營紛然響應副將羅宏裕等聞變亟往攔截該弁兵卽入城

沿街趕殺追至該副將衙門守備席光斗督隊直入刀矛並舉遊擊李王安副將羅宏裕參將王金階俱受重傷幕友委員盡遭戕害乘勢擁至督署及軍需局將幕友委員親兵等一律殺斃並分掠督協各署軍需釐金各局各守備汪榮另立野馬隊剽掠皋蘭金縣居民實屬目無法紀亟應分別嚴辦該督見將首先謀亂之王占鰲帶隊搶殺之席光斗汪榮等一百二十三人分別正法以昭炯戒在逃之馬魁馬文等仍著該督飭屬嚴密查拏務獲懲辦毋任漏網○諭軍機大臣等前因御史汪朝榮奏直東交界梟匪充斥請嚴飭緝拏當經降旨交崇厚等認真辦理茲據崇厚奏稱天津河間各屬時有梟匪私搶鹽灘非有兵勇常川遊巡難期淨絕根株記名總兵劉景芳前經劉長佑派赴天津等處巡緝頗資得力請飭調回直等語梟匪恃眾橫行最爲地方之害若不認真

搜捕日久必釀成巨患見在奉省餘匪無多兵力尙厚著都興阿
察看見在情形如兵力足敷搜剿卽飭劉景芳迅帶所部馬勇仍
回直隸聽候劉長佑等調派所有著名梟匪仍著崇厚會同劉長
佑督飭運司鎮道等勒限緝拏毋任延宕再察哈爾地方緊要著
都興阿飭令色爾固善迅卽來京前赴新任不許稍有逗畱將此
由四百里各諭令知之○諭楊岳斌奏各路軍營疊獲勝仗涼郡
解嚴請飭四川添解軍餉並出省剿賊各摺片南字明字兩營在
大營川清水驛趙家岔鹽溝各處獲勝提督王仁和署總兵楊占
鼐副都統瑞雲等軍亦屢次獲勝涼州解嚴張在山慶防一軍將
土匪蘇存鴻等股擊敗剿辦均屬出力在事員弁兵勇著楊岳斌
擇尤酌保毋許冒濫省垣變亂甫定正須大吏駐紮藉資鎮攝前
據楊岳斌奏擬出省剿賊當經諭令該督統籌全局妥協辦理此

時該督業已出省馳赴南路剿賊雖經派令羅進賢等督帶各營
畱紮省關內外而根本重地關繫非輕該督仍當迅飭蔣凝學一
軍趕緊進省嚴密布置毋得顧此失彼再蹈從前覆轍秦州一帶
回匪卽著該督迅速掃除不可稍涉延緩鶴齡所部川軍因糧餉
不繼飢斃陣亡餘存無多不成隊伍著卽飭令鶴齡將所存川兵
全散遣撤歸川以示體恤惟肅州圍剿正當喫緊必須甘省另撥
一軍會同黃祖淦剿辦方可替出成祿督軍出關著楊岳斌懷遵
前旨迅卽選派得力數營前赴肅州會剿所有川省應解鶴軍餉
銀著崇實賂秉章按月籌撥一萬兩解交成祿軍營由成祿軍營
就近添募勇丁出關剿賊則兵力較厚剿辦自易得手該將軍總
督等均受朝廷厚恩務當遵旨迅速籌辦毋得稍有推諉貽誤事
機成祿接奉此旨趕緊料理啟程馳赴奇古一帶會同李雲麟等

軍勦辦回匪不准藉詞延宕陝甘總督已令左宗棠調補閩省距甘遙遠左宗棠到任尙需時日楊岳斌仍當振刷精神將地方吏治軍務認真經理不得存五日京兆之見儻任意廢弛貽誤地方必重治該督之罪懷之將此由六百里各諭令知之○諭本日據楊岳斌奏才力不及病勢日增懇請開缺業經明降諭旨令左宗棠調補陝甘總督其閩浙總督令吳棠補授所遺漕運總督令張之萬調補並令蘇廷魁署理河東河道總督矣陝甘爲邊陲重鎮見當回氛甚熾楊岳斌於人地不甚相宜辦理未能有效眷顧西陲實深厯繫左宗棠威望素著熟嫻韜略於軍務地方俱能措置裕如因特授爲陝甘總督以期迅埽回氛綏靖邊圉該督於接奉諭旨後將閩浙印務交與英桂兼署迅卽馳赴新任悉心經理以慰厯繫閩浙見雖平靖而營務吏治廢弛已久吳棠到任後務當

認真整頓毋稍鬆懈見在洪澤湖等處盛漲疏洩甚關緊要而捻逆紛竄河防亦宜嚴密張之萬蘇廷魁膺此重任均宜加意整理不可稍有延誤將此由五百里各諭令知之○實授瑞麟兩廣總

督

由廣州
將軍遷

○楊岳斌以病免調左宗棠爲陝甘總督以吳棠爲閩

浙總督未到任前以福州將軍英桂兼署調張之萬爲漕運總督以蘇廷魁爲河東河道總督卞寶第爲河南布政使胡肇智爲順天府府尹

由陝西按察使遷

○甲辰諭軍機大臣等都興阿奏官軍攻克

大東溝踞賊及查明降賊徐中禮不法各情先行正法一摺匪犯徐中禮投誠後並未悔罪自新仍占踞孤山藉圖訛索聞大兵將至蓄意潛逃經色爾固善等將該犯拏獲正法並將其心腹匪首修樹林等一併擒斬所辦甚是其王作幅一股經總兵劉景芳帶兵往剿疊次獲勝剿洗殆盡王作幅是否傷斃仍著確切查明毋

任免脫見在鳳嶼二郡商民已均安業惟孤山地濱海口大東溝數爲奸藪亟須乘此聲威將餘匪剿除淨盡以絕根株卽著都興阿迅速調派官兵分投搜捕並嚴飭協領穆圖良催派戰船赴各島嶼訪拏餘匪認真躡緝不准一名漏網其孤山地方應如何撥兵駐守以資彈壓並著都興阿妥籌辦理另片奏統帶五行隊之副將潘永春於八月初二日夜間被戕身死其中顯有情節著該軍確切查明具奏毋稍諱飾將此由六百里諭令知之○曾國藩奏臣於途次接據劉松山等稟報張牛兩逆分股竄擾西平上蔡等屬逆氛連成一片六月十七日劉松山張詩日等由歸村至西華進剿張逆大股馬賊齊至步賊亦三道並出官軍力戰逾時追殺十餘里直抵上蔡之雙廟擒斬礮斃約逾千名據獲賊供稱該逆欲往西平約牛洛紅救援劉松山等以牛逆來援必經歸村恐

首尾不能相顧遂於十九日將歸村老營移紮永平寨該逆偵知
伏賊千餘於萬金寨旁意圖截取輜重總兵李祥和等合軍夾擊
斬獲多名旁竄各村莊者亦按勦殆盡二十日劉松山張詩日等
分路進攻雙廟老巢賊以大股迎敵各營槍礮齊發斃賊無算有
賊馬千餘包鈔我軍後路復經擊退各營乘勝猛進逆尸枕藉追
抵洪河落水淹斃者數里不絕綜計擒斬轟斃者約三千名淹斃
者過之張逆被創折向西趨二十三日我軍追及於鄆城之召陵
敗之直追至四合莊沿途擒斬數逾二千臣查張逆縱橫於齊豫
皖鄂之間從未大受懲創今經湘軍節次奮擊精銳損傷三分之
一兇餒頓衰實足快人心而伸天討各營將士於盛暑泥淖中徒
涉遄征忍飢苦戰可否容臣查明出力員弁彙案請獎以昭激勸
出自逾格恩施又奏任賴一股久居舞陽葉縣之交八月初間追

馬常至襄城郢城勢將回竄東北劉秉璋楊鼎勳於初四日由周家口前赴郢城堵剿張牛一股經劉松山張詩日暨豫省宋慶三軍跟蹤追剿七月二十一二十二等日又在新野鄧州續獲勝仗追至南召魯山該逆折竄寶豐葉縣等處邊馬至長葛洧川一帶
有回竄東北再窺山東之意臣檄劉銘傳潘鼎新兩軍由中牟尉氏一路迎剿既與長葛洧川相距甚近且可與劉秉璋楊鼎勳之師聯絡聲勢又令劉松山張詩日兩軍跟蹤回剿鮑超由汝甯北出迎擊總期力扼東竄以收兜剿之效至防河之策自朱仙鎮以下業由劉銘傳等興築隄牆工程約及八分見在一經調撥尙未能分汛堅守如果各軍遏賊西趨仍當一面追剿一面防河以符初議又奏臣在臨淮時感受暑溼醫治未痊力疾西上八月初九日抵周家口沿途調理外感漸愈惟用心輒汗須靜攝以冀速痊

合無仰懇 天恩賞假一月在營調理 上諭張牛等逆經劉松山等軍急追折竄寶豐葉縣等處該逆既有回竄東北再窺山東之意東省曹單等處應如何抽撥勁旅扼賊竄路之處著曾國藩妥爲布署前據官文曾國荃奏張牛等股竄至鄧州恐被擊西竄當令鮑超率軍由西路繞截該大臣見令鮑超由汝甯北出迎勦力扼東竄此時東路各軍兵力尙敷勦辦而西路甚屬空虚若不嚴爲之備萬一西竄入秦匪勢蔓延又成不了之局鮑超一軍自應遵照前旨由內鄉一帶欄截偪賊東趨以收聚殲之效著曾國藩與官文曾國荃悉心籌畫相機調撥該大臣以感受暑溼患病未痊殊深屢繫著賞假一箇月在營安心調理各路緊要軍情仍著隨時調度不可稍有疏懈將此由五百里諭令知之○諭總理各國事務衙門代奏署伊犁將軍榮全摺單等件榮全自伊犁大

城失守後羈留俄境欲於圖爾根河迤東紮營聚集索倫等兵乃索倫營總管德勤有心從逆推病不出事不果行嗣因哈薩克槍奪日甚榮全帶同官兵保護糧石至庫庫烏蘇俄境居住旋借道至喀帕兒並發索倫等賒欠銀兩派員採買米石見由喀帕兒往科布多投烏里雅蘇台大營該署將軍於上年八月間奉委催調俄兵所過斜米庫庫烏蘇等處經過夷臺二十九座所用車價及賞賚各項銀兩均著准其作正開銷前存俄國餉銀已飭解餉官趕緊由科布多解往烏里雅蘇台著麟興奎昌等派員迎提於解到後將此項銀兩交李雲麟分撥各營應用以資飽騰李雲麟前奏擬將科城兵一千二百名歸榮全統帶會合進剿榮全見到烏里雅蘇台自可與李雲麟會晤卽著妥商進剿用副委任至參將富貴等奉委護餉並未領過路費所有借用軍餉銀兩應如何抵

銷之處著麟興等酌量辦理富貴等仍著畱營差委領隊錫拉那辦糧遇賊多方保護旋因積勞身故著榮全查明請卹所用餉銀帳目著責令克新泰等趕緊報銷索倫領隊從逆之事是否確實著李雲麟密探據實具奏榮全已派署伊犁將軍嗣後遇有地方公事及緊要軍情著自行具奏毋庸再由總理各國事務衙門代奏將此由六百里各諭令知之○調英奎爲陝西按察使以劉典署甘肅按察使前浙江按察使○乙巳諭軍機大臣等李鶴年奏湘豫官軍會剿張牛逆股疊勝一摺張牛兩逆被豫軍擊敗後復經曾國藩派出之劉松山等會同合按剿殲斃賊匪甚眾該逆喪膽狂奔由南召魯山竄入汝州汝州經馬德昭擊敗遂向郊縣禹州鑽山而遁該逆屢經敗挫其膽已寒正可乘此機會痛加剿洗著曾國藩李鶴年分飭湘豫兩軍協力進剿迅將此股逆匪盡數殲除毋任

再行奔竄另片奏賊目桂錫楨懇請投誠等語桂錫楨一犯前因
僧格林沁曹南之敗竟甘心從逆本難稍從寬貸惟見當解散賊
黨之時若不暫准投誠恐賊中疑懼其黨愈固桂錫楨著准由李
鶴年招撫暫事羈縻如不奮勉立功或仍心懷叵測卽將該犯立
行正法毋稍姑息將此由五百里各諭令知之○以月食示儆飭
廷臣修省○廣江蘇南匯縣學額十名江西吉安臨江兩府學額
各二名永豐縣十名新淦一名○丙午命周祖培等詣定陵相
度地勢○王正誼以病免以德蔭爲河南按察使由開歸陳許道遷○命
阜保赴察哈爾照料征兵事宜○予浙江陣亡總兵官王振聲祭
葬世職○丁未以京師鹽價增昂諭劉長佑嚴禁奸商囤積○御
史盧士杰疏請楚豫皖三省合剿捻賊諭官文等會籌○御史慶
福條陳新疆事宜命德勒克多爾濟等酌議以聞○慶福請積粟

張家口綏遠城二處轉運新疆以濟軍食從之○戊申諭軍機大臣等李雲麟奏統籌西北路進兵機宜一摺據稱口內見調征兵由軍臺進止科城聽調有不便者四似速實遲似省實費似靜實擾且恐軍臺支應大兵則一切餉銀軍火文報全行阻隔更可憂者回逆若知大兵進剿分黨數千由奇古池東商賈大路徑竄歸化城十一日可到綏遠則三路官兵餉道皆斷坐潰堪虞方今之計莫如卽令口內征兵由大西路啟營前進則今冬必能抵古謹將應行事宜開單呈覽請飭軍機大臣會同戶兵兩部並咨行該統兵大臣速議施行等語大西路爲商賈買賣行走之捷徑由巴里坤迤北之三塘湖直趨古城途徑直捷兼有水草冬令較暖可利師行如此一轉移間既可迅速會剿又可杜該逆間道東竄之謀所奏不爲無見若待會議施行恐致耽延時日著劉長佑阜保

慶愛速行傳知直隸察哈爾各帶兵官卽照李雲麟所請由大西路一帶行走該兵丁行抵歸化沿途西進著福興德勒克多爾濟趙長齡穆圖善楊岳斌等各飭所屬妥爲照料並催趲前進徑赴古城毋任逗遛李雲麟單開請動款採買駝隻米石等項著福興等妥速辦理毋誤軍行庫克吉泰行抵何處卽著來京陛見德興阿速赴古城與李雲麟會籌進剿李雲麟摺單著鈔給庫克吉泰等閱看車林敦多布患病已有旨准其開缺調理其捐輸馬匹著卽賞收發交李雲麟軍營聽候調撥應得獎敘著理藩院覈議具奏見調之兵由李雲麟另行派員管帶錦丕勒多爾濟見授烏里雅蘇台參贊大臣著麟興催令迅速赴任以重職守李雲麟另奏採買戰馬二千匹一片准於新疆餉銀內動款採買解赴古城備此次所調兵丁乘騎訥爾濟伯錫爾奏查看哈密情形請催成祿

分兵出關赴哈並安西等處各派兵一千名由伯錫爾墊銀迎調
各摺片哈密漢城拆毀訥爾濟等見帶兵暫駐回城一切口糧鹽
菜均由伯錫爾墊辦急公可嘉所有應辦善後各事宜著訥爾濟
伯錫爾悉心籌辦死事各官弁仍著詳細查明請卹伯錫爾墊銀
五千兩派員迎提安西敦煌玉門所派之兵著於到哈後妥爲訓
遣成祿屢經有旨催令出關此時肅州如尙未攻拔著楊岳斌懷
遵前旨速派數營前赴肅州會同黃祖淦攻剿成祿仍趕緊料理
帶兵出關由哈密馳赴古城毋稍延誤內地征兵見不由烏科二
城行走係爲體恤蒙古臺站起見所有蒙古應調之兵仍著麟興
錦丕勒多爾濟奎昌明珠等迅速催集其俄國解回餉銀及陸續
解到新疆餉銀並著該大臣等源源報解李雲麟軍營用收飽騰
之效將此由五百里諭知庫克吉泰李雲麟德興阿穆圖善德勒

克多爾濟福興阜保劉長佑楊岳斌趙長齡麟興車林敦多布錦
丕勒多爾濟奎昌明瑤訥爾濟伯錫爾成祿並傳諭慶愛知之○
庚戌諭軍機大臣等李鶴年奏捻逆各股攻撲省南濠牆乘夜東
竄自請議處一摺任賴張牛四逆由中牟尉氏一帶合股東趨竄
近汴省河岸經礮船兵勇開礮轟退該逆遂併歸南路於蘆花岡
等處填濠越牆而進遂由陳留一帶竄向東北賊勢剽疾異常開
州東明長垣等處河防最關緊要清豐南樂一帶漏網兇徒恐有
由賊中逃回者煽惑勾結不可不慮著劉長佑飭令在事文武嚴
密防範並添調精銳兵勇或卽令臬司張樹聲前往大名一帶就
近調度以資得力不可稍涉大意運河東面濠牆閭閻銘當已補
修齊備卽著該撫嚴督所部各軍實力防守並著曾國藩檄飭李
昭慶督率所部聯絡東省將士互相援應遏賊北竄此時湘淮豫

各軍均落賊後東省守備空虛尤爲可慮曾國藩務當酌度機宜
飛催湘淮諸軍星夜折回東北緊躡賊蹤盡力兜擊並著李鶴年
檄飭宋慶之師視賊所向會合追剿毋稍鬆勁賊蹤飄忽靡定皖
北淮徐等處均宜豫籌布置著喬松年英翰調派皖軍分布皖北
邊境以備迎擊淮徐一帶水陸防務及運河防守事宜吳棠當迅
籌布置並著張之萬速赴新任接辦以專責成吳棠喬松年均應
實力經畫不得存五日京兆之見致滋貽誤此次賊匪竄越汴南
濠牆雖由兵力單弱所致究屬疏於防範李鶴年著交部議處正
在寄諭間據閩敬銘馳奏捻匪竄至蘭考逼近東境見籌布置一
摺捻眾條忽東竄荷澤曹縣等邑已見賊蹤閩敬銘擬撥出王成
謙一軍赴鉅野一路迎探攔擊並令王正起另帶振字五營赴鄆
鉅策應卽著飭令相機勦辦運河牆工已竣有險可扼並著分飭

各軍嚴防汛地毋任竄越惟東省兵力尙單仍恐不敷分剿曾國藩尤當迭飭各軍星馳援剿並飭李昭慶將長溝以南汛地大體嚴防張秋濮范一帶黃河防務更宜嚴密並著劉長佑閻敬銘隨時聯絡援應不可稍分畛域致誤事機將此由六百里各諭令知之○允郭嵩燾請召生員鄒伯奇李善蘭赴同文館差委○辛亥白蓮教匪楊汶政等謀逆事聞諭五城步軍統領各省督撫嚴緝○廣江西定南廳學額七名○壬子飭山西撥解科布多官兵餉銀○癸丑陝甘總督楊岳斌奏官軍進剿張家川逆股獲勝得旨張家川大股回逆雖經擊退難保不分竄平涼一帶仍著督飭王德勝乘勝追剿毋令蔓延○甲寅諭軍機大臣等前據胡家玉奏直隸練兵請改由京營挑選交總理各國事務王大臣管理當經交神機營王大臣會同兵部妥議具奏茲據奏稱添練京兵應由

總理各國事務王大臣擇地訓練所需餉項請戶部詳爲籌畫各等語除直隸改設六軍仍照戶兵兩部原奏辦理外訓練京兵原以固根本而防外侮若分設兩營則事權不一轉無以專責成自應仍歸神機營酌量添增於京營內挑選訓練毋庸歸總理各國事務王大臣分管惟戶部餉項見未存儲鉅款而此次所議添兵又爲目前急務未可以餉項未充稍事延緩著戶部詳爲籌畫如款項一時未能如數即將每月約籌兵餉若干先行知照神機營王大臣酌覈辦理一俟庫款稍裕再照所奏兵數隨時補足以備不虞所需軍火等項遇有缺乏之時並著總理各國事務衙門協同籌辦以期餉足兵精緩急有恃將此各諭令知之○諭前據總理各國事務衙門奏請變通直隸練兵籌餉章程並購備馬匹舉行屯田各摺片當經交該部議奏旋據戶兵兩部會議具奏練兵

章程十七條及廣東等省固本餉銀解部轉撥以供支應詳加披覽尙爲周密見當賊氛未靖外侮可虞自應擇要扼紮以資拱衛卽著照所議於遵化等處各駐一軍每軍步隊二千人馬隊五百人共合一萬五千人於督提各標內挑選分派將領認真訓練統歸該督節制所需馬匹卽於直隸額設騎操馬內撥補如有不敷著劉長佑設法購買卽倣照神機營餵馬章程辦理所請發給將領關防酌給官弁薪水增給兵丁口糧均著照所請行經此次嚴定章程令在必行劉長佑前請挑揀兵丁一萬五千名精勇五千名迄今數年之久毫無成效若再任意延緩尙復成何事體著該督於半年內務將辦理情形詳細奏報毋得視爲具文敷衍塞責所練各營朝廷當隨時簡派大員前往校閱儻有訓練不精軍實不齊之弊必當從重懲處劉長佑受朝廷厚恩值此時事多艱諒

不敢仍沿積習致負委任其舉辦屯田一節並著該督酌量辦理總理各國事務衙門摺片三件戶兵兩部會議摺單各一件均著鈔給閱看將此諭令知之○諭楊岳斌奏曹克忠見赴陝西請催還甘省一摺覽奏殊堪駭異曹克忠係見任甘肅提督職守攸關且正當軍務喫緊之際何得擅行棄置徑赴鄰省前因該提督患病曾經降旨賞假兩箇月令其在蘭州城內安心調理毋庸遠道就醫並賞給人護四兩以示體恤乃該提督不候諭旨遽已赴陝來去自由實屬不曉事體曹克忠著交部議處並著劉蓉嚴催該提督星夜折回甘省儻再不知輕重任意遷延致所部將士相率效尤擅離汛地該提督自問當得何罪蘭州爲省垣重地變亂甫定文武大員相繼出省空虛可慮楊岳斌務當飭令王得勝等分統曹克忠所部各營恪守紀律不得任意妄行並飭令暫護提督

鄧全忠經理營務毋任散漫無紀一面嚴催蔣凝學統率所部趕緊赴省彈壓撫綏穆圖善督率兵勇由甯夏啟程前赴中衛一帶卽著相機剿辦省垣近日情形若何餉道是否通暢並著該將軍就近妥籌兼顧將此由六百里各諭令知之○乙卯曾國藩奏八月十三日疊據各路稟報張牛任賴等逆屬聚許州禹州一帶決志東竄臣所部游擊之師如劉秉璋劉松山等軍由西路追賊東回先後趕至許州襄城而賊復逃邏北竄防河之師如劉銘傳潘鼎新等軍八月初間分防各汛一律工竣十一十二兩日趕赴汴梁幫修省北濠隄十四日劉銘傳回至尉氏潘鼎新回至樊寨十五日據擒賊供稱該逆欲於中夜由汴梁左右東竄劉銘傳等移紮朱仙鎮以上一面牽制北路賊勢一面兼顧本管汛地十六夜瞭望火光漸熄而北偏近豫軍長牆派馬馳探行至離汴省十餘

里見隄牆已毀塌數處詢據余承恩云二更時賊股潮湧撫標三營所守隄牆當被衝破賊已竄逸東去等語劉銘傳卽派烏爾圖那遜等馬隊向東追剿派唐殿魁一軍向北截剿未過之賊烏爾圖那遜追至杞縣頗有擒斬唐殿魁行至汴梁城南遇牛逆後股當卽攔腰猛擊截回馬步賊千餘向南逃去臣查河防陸路七百餘里水路九百餘里地段太長自張市朱仙鎮直至黃河浮沙壅塞卽使竭數月之力認真修防猶未敢謂百無一失臣固早已慮及今一處疏失功敗垂成半由於人力未周半由於賊勢過重聞信之餘實深焦憤見已檄劉銘傳潘鼎新兩軍由虞城單縣一路劉秉璋楊鼎勳兩軍由徐州韓莊一路均赴山東跟蹤追剿又飭張樹珊一軍由徐州馳赴曲阜豫衛孔林其李昭慶一軍本留濟甯韓莊等處防守運河計臣所調度之淮勇七軍除周盛波一

軍暫留周家口外餘均飭赴山東與羣賊縱橫追逐至運河防務自夏水盛漲隄牆坍塌七八月間又經加土修築差覺可恃但此次賊眾且悍誓欲渡運東竄深秋水落能否堵禦完固殊未敢必且賊蹤紛竄無定黃河防務同時喫緊應請旨飭下直隸督臣山東撫臣堅守黃河令礮船上下梭巡屏蔽畿輔務保萬全又奏此次擒匪全股東竄出於各處所不及料查朱仙鎮以上豫省防兵係余承恩及撫標三軍在所轄汎地失事本應從嚴參辦惟該處係屬沙地難於挑挖七月下旬始行興工時日過迫濠牆未能堅深兵不足三千賊勢浩大不克抵禦尙屬情有可原臣是以未及查取職名會商參辦初一日臣聞賊將東竄卽檄劉銘傳潘鼎新兩軍赴中牟尉氏攔剿若該兩軍果至中牟十五十六兩日當可攔頭痛剿乃僅進駐朱仙鎮之北相隔稍遠遂失機宜亦有不合

惟自朱仙鎮以至槐店陸路四百里沿河迂繞則五百里皆劉銘傳等糾約淮軍晝夜修築八月初旬一律畢工其張市以上六十里亦係沙地潘鼎新力任其難修築堅固該兩軍又曾助豫軍修芝汴北二千餘丈頗著勞勩雖未赴中牟迎剿稍失機宜而所守汎地究無疏失劉銘傳潘鼎新均應免其置議至籌防沙河賈魯河之議經臣兩次函商安徽河南撫臣趕緊興辦疊接覆信均稱照議辦理厥後安徽認真修防而河南未遽舉行李鶴年旋有沙多難辦之奏辦事遲疑不無可議惟該撫亦有大可諒者河南各官之議均謂賊衰宜於速剿不必防河賊勢急欲西趨不至東竄幾於眾口一辭並聞京師人士持議亦多如此李鶴年惑於眾論並非有意執拗迨聞淮軍皖軍河防次第畢工乃續調馬德昭回防汴北而爲時已遲矣其宋慶一軍在南陽剿賊得力李鶴年不

欲調回修防尙係救民水火之至意業經該撫奏明儻李鶴年自

請議處籲懇

聖恩暫予免議以觀後效

臣

主持防河之策辦無

成效分應引咎自責惟目下不參疏防汛地之員亦宜暫緩請處

儻東竄之賊蔓延太廣局勢日壞

臣

甘受嚴譴不敢諉咎他人

臣

非不知防河爲拙計柰馬隊遠不如賊專恃步隊追剿斷不能制

流寇不得已乃出於防河之下策若賊再回竄仍當扼防沙賈兩

河遏賊不得復東庶軍務漸有歸宿仰祈

皇上豫飭河南撫

臣

爲將來同心設防之計又奏上年九月欽奉諭旨派李鴻章帶兵

馳赴洛陽彼時洛陽並無賊蹤而

臣

所帶之兵均係李鴻章所部

察看賊志實在東而不在西李鴻章亦恐一離本任則糧餉軍火

均無所出彼此據實奏覆事遂中止今則賊趨東路而

臣

駐紮周

家口相距較遠且值因病請假期內萬難迅速移營徐州濟甯若

移紮東路又恐賊匪折回西竄仍覺調度不靈伏查嘉慶道光年間黃河防汛時兩江總督出駐清江或駐徐州本有成例可否籲懇天恩特降諭旨飭令李鴻章攜帶兩江總督關防駐紮徐州專顧本轄之徐海淮泗各府並與山東撫臣商辦山東軍務俟東路軍情稍鬆仍回駐金陵或駐清江竭力籌餉以固軍心而維大局至西路見雖稍鬆亦不可不豫爲籌備臣弟曾國荃業已出省駐紮德安惟歷年賊勢在豫時多在鄂時少捻匪若擾南汝光及汝洛等屬不特鮑超可以馳剿卽曾國荃所部諸軍亦可越境會剿可否請旨飭下湖北撫臣曾國荃遇河南緊急時攜帶關防移紮南陽府與河南撫臣商辦軍務俟豫事稍鬆仍回駐德安或回武昌兼籌餉項臣見駐周家口正居數省之中如中路有事臣與豫皖兩省撫臣商之東路有事李鴻章與山東撫臣商之西路有

事曾國荃與河南撫臣商之庶可聯絡一氣呼吸相通。上諭軍機大臣等曾國藩所奏捻首張牛任賴四逆合股東竄河防無成與李鶴年前奏大致相同曾國藩見已飭令劉銘傳等分赴山東追剿著卽嚴檄各軍視賊趨重處所盡力追剿閻敬銘尤當督軍嚴扼運河毋任賊騎東渡黃河爲畿輔屏蔽防務尤關緊要著劉長佑閻敬銘嚴督水師礮船梭織巡防並飭陸軍實力堵遏張秋濮范一帶尤宜不分畛域互相援應余承恩於畿南情形較爲熟悉卽著李鶴年將余承恩一軍調回直隸以固河防賊股分合靡常趨向無定江皖邊境亦須力籌堵截並著吳棠喬松年英翰恪遵前旨督軍扼守要路以備迎擊曾國藩見駐周家口距濟甯徐州較遠難於兼顧著李鴻章迅卽攜帶關防出省馳赴徐州駐紮就近調度淮湘各軍防務保衛淮徐以東各路並與閻敬銘商辦

山東軍務互相策應李鴻章未出省以前淮徐防務仍著吳棠辦理並著張之萬遵奉前旨迅赴漕督新任儻賊折回豫西曾國荃亦當督率鄂軍越境馳赴南陽會同豫師合剿並隨時與李鶴年商辦軍務聯絡聲勢總期合數省之力迅掃狂氛不可稍分彼此曾國藩總領師干尤宜統籌全局毋得專諉地方督撫致軍事散漫無紀鮑超一軍並著官文曾國荃飭令趕緊赴豫由曾國藩相機調遣毋再遷延干咎李鶴年統防濠牆前據該撫自行奏請議處業已降旨交部議處矣劉銘傳潘鼎新到防雖遲據奏分守濠牆尙無貽誤著從寬免議汴省應修濠牆著李鶴年實力興辦防賊回竄毋稍弛懈至剿辦機宜固須博采眾議而軍情變幻無常更當隨時酌度內斷於心朝廷總以辦理有無成效爲憑該人臣督撫等惟當同心竭力埽除餘孽速竟全功毋得各懷疑忌致負

委任將此由六百里各諭令知之○允曾國藩請調浙江總兵官馬德順赴豫管帶馬隊○予貴州陣亡參將廖得勝等祭葬世職○予江蘇殉難知縣劉同纓建祠○丙辰諭軍機大臣等成祿奏肅城未克亟籌募勇撥兵請飭趕辦皮衣派兵赴哈密交麟丁憂請旨辦理各摺片成祿官軍圍攻肅城由東門等處分路進剿屢有斬擒因遊擊張起龍等陣亡功敗垂成以致堅城未克成祿屢經有旨催令出關此時肅州尙未攻拔著楊岳斌懍遵前旨速撥數營前赴肅州會同黃祖淦設法圍攻迅圖規復成祿仍趕緊部署一切帶兵出關毋稍延誤黎獻所部馬步六營前已有旨交黃祖淦代領著楊岳斌成祿傳知黃祖淦卽將黎獻所領六營妥爲管帶以資厚集黎獻能否勝任尙未據楊岳斌查奏茲據成祿奏黎獻自去冬潰走後見派熊占魁駐紮總寨距肅州三十餘里不

肯前進並騷擾鄉民十室九空等語著楊岳斌一併詳查參奏曹克忠假期將滿著該督恪遵前旨責令該提督折回甘省成祿所請曹克忠西行助剿之處著該督酌量情形相機調撥成祿以伯錫爾請兵會攻吐魯番城當派精銳一營並安西兵勇一千五百名令明春統帶前往惟哈密新克必須重臣鎮撫仍著文麟趕緊出關前赴新任會同伯錫爾將一切事宜妥爲辦理文麟所管糧臺事務著成祿就近另派妥員接管塞外地方苦寒成祿奏帶兵出關擬於涼甘安肅各屬趕辦無面長皮襖統一萬件所需價值准其作正開銷等語著楊岳斌卽照成祿所請飭屬妥速辦理將此由六百里各諭令知之○予甘肅傷亡總兵官慶瑞陣亡遊擊張起龍祭葬世職○是月蠲免貴州都勻等六府麻哈等二十四州縣古州等九衛暨普安同知清江等通判冊亨州同錦屏鄉縣

丞所屬被擾額賦蠲緩湖北黃陂黃岡二縣暨黃州衛被擾新舊
額賦廣東羅定等八州縣被擾額賦並江西蓮花等二十廳縣九
江府司知所屬被水被旱新舊額賦山東壽張等九縣暨臨清衛
被擾被旱被風被雹新舊額賦